

TUTÚ NÍ CADÚHA TÉ PĀBLÚ QUÍHÍⁿ NDAHA TÉ TÌTÚ

Té Pāblú cādūha-dé tutú quíhíⁿ ndaha té Títú

1 ¹Yúhú té Pāblú xínú cuèchi-í núú Yă Ndiöxí, te diu-gá ní tendaha ñàha-gá xii-í càháⁿ-í tnúhu Xítóhó Jesucristú núú ñăyiu cuèndá quíndáá iní nchaa ñăyiu ní cachí Yă Ndiöxí naníhí tàhú, ndihí cuèndá sá tècú tnùnì váha-yu tnúhu-gá, te ñăyiu na quíndáá iní tnúhu-gá cada ndáá-yu cundecú-yu ichi-gá. ²Te yúhú dácuaàha-í-yu tnúhu-gá cuèndá cundecu ndihí-yu tnúhu ndee iní sá cùndècu ndihí-yu Yá Ndiöxí ni caa ni quíhíⁿ, chi ndéé cútnàhá vátá ngăva-gá ñuyíú-a ní cachí-gá sá cùndècu ndihí ñaha-gá xii-yu, te ñá túú dāndahú ñáhá-gă, chi quide-gá ìⁿ sá càháⁿ-gá. ³Te ní sáá nduu nǐ cachí-gá sá ñihí-yu tnúhu nàcuáa cuáháⁿ tnúhu-gá, te diu-ni tnúhu-áⁿ nǐ cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dácuaàha-í ñăyiu. ⁴Te tutú-a cādúha-í cuèndá daquixi-í ndaha yòhó té Títú, téé ní sanu ichi ndisa-í ichi Xítóhó Jesucristú, chi ìⁿ-ni tnúhu sàndáá iní-ó. Te xicáⁿ táhù-í núú Tătá-ó Dütú Ndiöxí sá ìo na chindee chitúu ñaha-gă xii-n, te diu-ni-gá ná càda te ìo váha cuu iní-n cùndecu-n. Te xicáⁿ táhú tucu-í núú Xítóhó Jesucristú Yaá dácăcu nihnu ñaha xii-o núú ùhú núú ndàhú sá dǐú-ní dùcaⁿ na cada ñaha-gá xii-n.

Chìuⁿ quide té Títú distritú Crětá

⁵Te yúhú ní dándöo ñaha-ì xii-n dístritú Crětá, chi cuiní-í cada-n nchàa chiuⁿ cumánì, te cuiní-í taxi ndecu-n cuè téé quindaha ñàha xii cue ñăyiu sàndáá iní tnúhu Yá Ndiöxí xǐndecu ìⁿ ìⁿ ñuú yǐndèhu distritú-áⁿ, te cada-n nàcuáa ní cachí-í cada-n. ⁶Te cue téé cada chìuⁿ-áⁿ xínì ñùhu-xi cuu-güedé mee-ni cuè téé ìo váha quide ndáá nàcuáa vá yòo cáháⁿ dóho-güedé, te na cù-güedé cue téé ndècu ìⁿ dii-ni ñadìhí-xi. Te ducaⁿ nchàa landú-güedé ná cù-güexi landú sàndáá iní ñáhá xii Yá Ndiöxí cuèndá sá vǎ yòo cuatnuñàha xii-güexi quesahá-yu sá ìo sáá iní-güexi te quide-güexi nándì sá ñà túú tàú-güexi cada-güexi. ⁷Chi xìnì ñuhu-xi sá ncháá cuè téé quindaha ñàha xii ñăyiu sàndáá iní tnúhu Yá Ndiöxí ìo cundecu yǐñùhu-güedé, chi ducaⁿ tàú-xi cada nchaa cue téé quide chiuⁿ Yá Ndiöxí, te xìnì ñuhu tucu-xi sá vǎ cúú-güedě cue téé ñíí iní-xi, te ni vǎ

cúu-güedë cue tée lĩhli iní-xi, te ni vã cúu-güedë cue tée quihu, te ni vã cúu-güedë cue tée plètú, te ni vã cúu-güedë cue tée òcò-ni ducaⁿ ñhí dǐhúⁿ. ⁸Te xini ñuhu-xi cuu-güedé cue tée sãñaha nùu vehe ndetatú cue ñáyiú ñùhu ichi, cue tée quide váha sá cúu-xí tnàha ñáyiú-xi, cue tée ío váha cùtnuní iní-xi nàcuáa cada cundecu ñuyíú-a, cue tée quide ndáá xĩndecu, cue tée quide nchaa nacuáa ndùu vétú iní Yã Ndiöxí, cue tée xito mee-xi ñá túú quide cutexínu. ⁹Te na cùu-güedé cue tée ío váha sàndáá iní tnúhu váha tnúhu Yá Ndiöxí sá ñí dánèhé ñãhà-í xii-ndo cuendá ducaⁿ te cue tée-áⁿ ndacu-güedé cáháⁿ-güedé dóho ñáyiú cuendá cádá-yu nchaa nàcuáa càháⁿ Yã Ndiöxí, te ñhí-güedë tnúhu cáháⁿ váha-güedé núú nchaa ñáyiú dàquee tǐhú tnúhu Yá Ndiöxí, te mee-ni cuè tée ducaⁿ quide váha taxi ndecu-n quìndaha-güedé ñáyiú sàndáá iní tnúhu-gá.

¹⁰Te na càchí tnúhu-í xii-n sã váí ñáyiú sàá iní-xi ío, te càháⁿ-yu mee-ni tnúhu sá ñà túú nàndǐhi, te dándahú-yu tnàhá ñáyiú-yu, te ñáyiú isràél ío-gá vài-yu ducaⁿ xǐquide. ¹¹Te nchaa ñáyiú ducaⁿ xǐquide xini ñuhu-xi nducu-o tnúhu cúñaha-o xíi-yu cuendá cadí-yu yuhú-yu, chi dānehé-yu dava-gá ñáyiú ìiⁿ sá ñà túú tàú-yu dacuàhá-yu, te ducaⁿ quidé-yu cuendá-ni sá ñhí-yu dǐhúⁿ, te ío titní xichi ní cuu dándahú-yu nchaa ñáyiú xĩndecu ìiⁿ-ni vèhe.

¹²Te ní cachí ìiⁿ tée ío váha sàá díquí-xi ndècu mei ñuú distritú Crètá sá ncháá ñáyiú ñuú-dé-áⁿ ìo ndèhndé-yu, te ío cuihna ìní-yu, te ío vài xexí-yu, te cùhndú-yu. ¹³Te ndáá ní cáháⁿ-dé chi ducaⁿ quidé-yu, te xíãⁿ ío cáháⁿ-n dǒho-yu cuendá sá ná quìndáá váha iní-yu tnúhu Yá Ndiöxí. ¹⁴Te cúñaha-n xíi-yu sá vã cádá cuendá-yu nchaa tnúhu ndehnde càháⁿ ñáyiú isràél, te ni vã cádá cuendá-yu nchaa tnúhu càháⁿ ñáyiú ñá túú cuìní quìndáá iní tnúhu Yá Ndiöxí.

¹⁵Te nchaa sá ñí cadúha Yá Ndiöxí ío ñuyíú-a cùu-xi mee nine-ni sá vãha sá cúu-xí nchaa ñáyiú sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá vãha sá cúu-xí nchaa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sã cuèhé sá dúhá ñùhu iní-yu, te ñá túú quide cuendá-yu núú quide váha-yu àdi ñá túú quide váha-yu ndècú-yu. ¹⁶Te càchí-yu sá sàndáá iní-yu Yá Ndiöxí, dico nchaa sá quidè-yu-áⁿ càchí tnùní-xi sá ñã ndàá. Te Yá Ndiöxí chi duuⁿ duuⁿ ñá túú tnàhá iní-gá nchaa nàcuáa quidé-yu, chi ío sàá iní-yu, te ñá túú quidé-yu ni ìiⁿ sá vãha.

Tnúhu váha tnúhu Yá Ndiöxí

2 ¹Te yòhó òré dánèhé-n ñáyiú, te dánèhé-n-yu mee-ni nàcuáa càháⁿ tnúhu váha tnúhu Yá Ndiöxí. ²Te nchaa cue tée cùu sacuéhé ná càda cuendá-güedé vá cádá cùtexínu-güedé cundecu-güedé, te na cùndecu

yiñuhu-güedé, te na cuãha váha-güedé cuëndá nàcuáa cada-güedé cundecu-güedé, te na quìndáá váha iní-güedé Yă Ndiöxí, te na cùu iní-güedé tnàha ñáyiü-güedé, te na cùnduu cahnu iní-güedé cuèi nándi sá ná yãha-güedé. ³Te vitna càháⁿ tucu-í sá cúú-xí nchàa ñáyiü dîhí ñáyiü cùu sacuéhé sã ná cùndecu yiñuhú-yu, te vá cúü-yu ñáyiü yiti yùhu-xi, te ni vã cúü-yu ñáyiü quihu, te na dânehé-yu nchaa dava-gá ñáyiü cada váha-yu. ⁴Te na dâsahú-yu nchaa ñáyiü dîhí ñáyiü cuechi cuëndá ná cùu iní-yu yîi-yu, ndihi cue landú-yu, ⁵ndihi cuëndá sá ná càni váha iní-yu nàcuáa cundecú-yu, ndihi cuëndá sá vã cáni ìní-yu cadá-yu ni ìiⁿ sá cuèhé sá dúhá, ndihi cuëndá sá ná càdá-yu nchaa chiüⁿ ñuhu vehé-yu, ndihi cuëndá sá cadá vãha-yu nchaa tnàha ñáyiü-yu, ndihi cuëndá sá ná cadã-yu nchaa nàcuáa càháⁿ yîi-yu, te ducaⁿ xini ñuhu-xi cadá-yu cuëndá sá vã yõo càháⁿ cuèhé cuëndá tnúhu Yá Ndiöxí. Duha cúñaha-n xii cue ñáyiü dîhí ñáyiü cùu sacuéhé cuëndá ducaⁿ dâsahú-yu nchaa ñáyiü dîhí ñáyiü cuechi.

⁶Te yòhó càháⁿ-n dôho nchaa cue téé cuechi cuëndá sá ná càni váha iní-güedé nàcuáa cundecu-güedé, ⁷te cada-n mèt-ni sá vãha cuëndá ducaⁿ cànchicúⁿ nihnu-güedé cada-güedé, te òré danèhé-n-güedě te ío váha cuu iní-n dânehé-n-güedě, te ndihi tnúhu yiñùhu càháⁿ ndihi-n-güedě. ⁸Te càháⁿ-n mèt-ni tnúhu váha, te ducaⁿ te vá yõo ìiⁿ càháⁿ cuèhé cuëndá tnúhu càháⁿ-n, te nchaa ñáyiü cùu úhú iní ñáhá xii-o cucahaⁿ núü-yu, te vá nihí-yu tnúhu càháⁿ cuèhé-yu cuëndá-ó.

⁹Te ío càháⁿ-n dôho nchaa cue téé xinu cuechi sá ná quìndáá iní-güedé cada-güedé nchaa chiüⁿ tahu patróóⁿ-güedě nàcuáa cudü-güedé núú cuè téé-áⁿ, te vá càháⁿ sàá iní-güedé. ¹⁰Te vá cáni ìní-güedé duhu-güedě, te cada ndáá-güedé cuëndá sá ñà túú nã cani iní ñáhá cuè patróóⁿ-güedě, te ducaⁿ te cutnùní iní ñáyiü sá tnùhu Yá Ndiöxí ío váha dânehé ñáhá-xí nàcuáa cada-o cùndecu-o, te diu-gá cúú-gã Yaá dácăcu nihnu ñaha xii-o núú ùhú núú ndàhú.

¹¹Te nchoo nî cutnùní iní-ó sã Yă Ndiöxí ío cùndahú iní-gá nchaa nchoo ñáyiü ndècu ñuyíü-a, te ní taxi-gá tnúhu ndee ìní sá nánihí tàhú nchaandi túhú ñáyiü te núu na quìndáá iní ñáhã-yu xii-gá. ¹²Te ní cachí-gá sá dáñá-ó nchàa ichi cuehé ichi duha chi ñã tnàhá iní-gá cundecu-o ìchi-áⁿ, te vá ìo cuhuⁿ iní-ó nchàa sá ìo ñuyíü-a, te ní cachí tucu-gá sá ìo cani iní-ó nàcuáa cundecu-o vitna ndecu-o ñuyíü-a te cada ndáá-ó cùndecu-o cuendá nduu vétú iní-gá. ¹³Te cundetü-o sàá nduu càhnu vihi, nduu quixi tucu Xítoho Jesucristú Yaá cúú Ndiöxí-ó, te diu-gá ní dácăcu nihnu ñaha-gã xii-o núú ùhú núú ndàhú. Te nduu-ãⁿ ìo cudíí iní-ó. ¹⁴Te mee-gã ní xíhí-gá chi ducaⁿ nî cuiní-gá cunduu, te ducaⁿ nî quide-gá cuëndá nchoo vã cùndècu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiü quìndaha-gã, te ni yùhu ni iní-ó càda-o mee-ni sá vãha.

15Te nchaa tnúhu-áⁿ danèhé-n-yu te cúñaha-n xíi-yu nàcuáa cadá-yu, te cáháⁿ-n dõho-yu te núu ñá túú quide ndáá-yu. Te cada-n sã cúú-n ìⁿ téé xínu cuechi núú Yã Ndiõxí, te vá dáñá-n mèe-n daquee tíhú ñáhá ñáyiú xii-n.

Nchaa sá tàú ñáyiú ndècu ichi Yá Ndiõxí cadá-yu

3¹Te cúñaha-n xíi-yu sá ná quèndáá iní-yu cadá-yu nchaa nàcuáa càháⁿ nchaa cue téé cùchiuⁿ, te tàú-yu chindee ñàhá-yu xii-güedé nchaa chiúⁿ váha quide-güedé. ²Te vá càháⁿ cuèhé-yu cuèndá ñáyiú, te vá cúndùu pletú-yu, te na cúú-yu ñáyiú ndàhú iní-xi, te na cùndahú iní-yu nchaa tnàha ñáyiú-yu.

³Te tnàhá-ó ñí xóo cada-o dàtná quidé ñáyiú-áⁿ vitna, chi ío ñí dǐquí-ó chi ñá tècú tnùní-ó nàcuáa càháⁿ tnúhu Yá Ndiõxí ní cùu, te ío ní xínduu sàá iní-ó nǔú-gã, te ní xíndecu-o ìⁿ ichi sá ñà túú tàú-ó cùndecu-o ni cuu, te nándi sá cuèhé sá dúhá ìó ñuyíú-a ní xóo cudíí ìní-ó ñí xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o ìchi cuedú iní, te cuèndá nchaa sá ñí xóo cada-o-ãⁿ xíãⁿ ío ní xóo cuu úhú iní ñáhá ñáyiú xii-o, te ducaⁿ-ni nchòo tucu ní xóo cuu úhú iní-õ-yu. ⁴Te Yá Ndiõxí Yaá ní dácãcu nihnu ñaha xii-o núú ùhú núú ndàhú ní dándíxí tũu-gá iní-ó nàcuáa cutnùní iní-ó sã ìo váha iní-gá, te cùu iní ñáhá-gã xii nchaa nchoo ñáyiú ndècu ñuyíú-a. ⁵Te Yá Ndiõxí ní dácãcu nihnu ñaha-gã xii-o nǔú ùhú núú ndàhú, dico ñá díú cuèndá ìⁿ sá vãha quide-o ndecu-o ñuyíú-a ducaⁿ ñí quide-gá, chi mee-gã ducaⁿ tnàhí ní cundàhú iní ñáhá-gã xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyiú saa, chi Espíritú Yã Ndiõxí ducaⁿ ñí quide ñaha-xi xii-o. ⁶Te Espíritú-gá ní taxi-gá ni yùhu ni iní-gá ndécú ndìhi-o, te ducaⁿ ñí quide-gá chi ní sándáá iní-ó Xítohó Jesucristú Yaá ní dácãcu nihnu ñaha xii-o núú ùhú núú ndàhú. ⁷Te ío cùndahú iní ñáhá-gã xii-o nũu sa ní quide ndáá-gá cuéchi-o te ní cuu-o dèhe-gá, núu xíãⁿ vitna ndètu-ná-ó sãá nduu ndùu táhú-ó cùndecu-o ndìhi-gá ni caa ni quíhíⁿ.

⁸Te tnúhu ní cáháⁿ-í-a cùu-xi tnúhu ndáá cuiti, te cuìní-í sá ñí yuhu ni iní-n cãháⁿ-n tnúhu-gá núú-yu cuèndá sá ncháá ñáyiú sàndáá iní ñáhá xii Yá Ndiõxí nducu ndèé-yu cadá-yu mee-ni sã vãha, te tnúhu-áⁿ cúú-xí mèe-ni tnúhu váha, te ío váha sá cúú-xí-yu. ⁹Te vá cádá cuèndá-n nchàa tnúhu sá ñà túú nàndíhi xítnàha ñáyiú, te vá cádá cuèndá-n ñáyiú nándi càháⁿ cuèndá nchaa sá ñí xóo cada cue ñáyiú ní xíndecu ndéé sanaha, te vá cádá cuèndá-n nchàa tnúhu xítnàha ñáyiú xícuèhé tnàhá cuèndá tnúhu ní chídó tnùní ndíi Moisés, chi nchaa tnúhu xítnàhá-yu-áⁿ ñà túú tnàhí nandíhi-xi, te dàcuíta ñaha-xi xii-o.

TITO 3

10Te núu ío ñáyiú ní ngüíta-yu náandi tnúhu càháⁿ-yu cuèndá sá vǎ cúú ñⁿnuu cue ñáyiú ndècu ichi Yá Ndiöxí ñá, te ñáyiú-áⁿ cǎháⁿ sàhú-n dõho-yu ñⁿ úú xito, te núu vá tnǎ-yu tnúhu càháⁿ-n ñá, te vá ñihí tnáhá-gǎ-n ndihí-yu. 11Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuìní-yu cadá-yu sá vǎha, chi mee-nǎ sá cuèhé sá dúhá tnáhá iní-yu cadá-yu, te cùtnuní iní méě-yu sá ñà túú quìde ndáá-yu, te sáá nduu te nacháhu-yu nchaa sá quídě-yu.

Nàcuáa cada té Títú

12Te cuìní-í tendaha-ǎ té Àrtemás quixi-dé núú ndécú-n àdi té Tìquicú, te òré ná quèxio ndéda-ni càa ñⁿ cue téa-núú ndécú-n, te ío nducu ndè-n quíhíⁿ-n ñùú Nìcópolis núú quíhíⁿ-í cundecu-í, chi yàcáⁿ cuìní-í quíhíⁿ-í cundecu-í yóó quídé vǎxiⁿ-xi. 13Te ío cuáñaha-n nchàa sá xíní ñùhu té Zènas téa ío váha xíní nchaa nàcuáa càháⁿ lèi, ndihi té Àpolós cuèndá sá ñà túú ñà cumání xii-güedé ichi. 14Te cuìní-í sá ncháá ñáyiú ndècu ndihi-o ichi Yá Ndiöxí cada váha-yu, te cuáñahá-yu ñⁿ sá xíní ñùhu ñáyiú, te ío váha chiuⁿ cadá-yu te núu ducaⁿ na càdá-yu.

Tnúhu ndéé núú ñí ndihi-ná

15Te vitna ío cada ndee iní-n càchí nchaa ñáyiú ndècu ndihi-í iha, te cúñaha-n sǎ ño na càda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiöxí. Te Yá Ndiöxí ío na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cadá ndèe iní-nǎ vitna.